

秋

林

琴

雅

余束髮喜學爲詞同時有洪稊村沈柳亭輩嘗爲倡和彼皆尙花庵草堂餘習往往所論不合未幾各爲他事牽去出處靡定不能專工於一今二君已化爲宿草余猶視息人世閒作倚聲之歌幾無一人可語者去臘於友人華秋岳所讀樊榭高陽臺一闋生香異色無半點烟火氣心嚮往之新年過訪披襟暢談語語沁入心脾遂相訂爲倡和之作共得題如干并注以調名乃不數日兩家已各成其半會余適有白門之役孟夏解纜羈留吳苑者二旬又足成之頃寓秦淮樊榭書至知前後俱削稿復合以平時所作付

之梓人先以首卷刻成者寄示廻環讀之如入空山
如聞流泉真沐浴於白石梅溪而出之者噫舍紫山
而外知此者亦鮮矣獨余沈酣斯道幾五十年未能
洗淨繁蕪尙存故我以視樊榭壯年一往奔詣寧不
有愧乎時康熙六十一年壬寅白露前一日同里紫
山徐逢吉題

詞調六百六十體凡千一百八十有奇一調有一調
之章程一體有一體之變化作法旣殊音響亦異殆
難於詩遠矣余友徐紫山嘗教余作詞謝不能也厲
君太鴻於詩古文之外刻意爲長短句拈題選調與

紫山相倡和大約懷古咏物之作爲多數月之間動
成卷帙聲諧律叶骨秀神閒當于豪蘇膩柳之間別
置一席至于琢句之雋選字之新直與梅溪草窗爭
雄長矣余學詩垂四十年尙不能工太鴻工詩工古
文而琴雅一刻各極其妙人之智愚何相去之遠絕
也石倉吳允嘉

詞於詩同源而殊體風騷五七字之外另有此境而
精微詣極性南渡德祐景炎間斯爲特絕吾杭若姜
白石張玉田周草窓史梅溪仇山村諸君所作皆是
也自是以還正不乏人而審音之善二百餘年以來

幾成輟響近稱西泠詞派或踪跡花間或問津草堂
星繁綺合可爲極盛廼緣情體物終惜其體製之未
工獨吾友樊榭先生起而遙應之清真雅正超然神
解如金石之有聲而玉之聲清越如草木之有花而
蘭之味芬芳登培嶢以攬崇山涉橫汙以觀大澤致
使白石諸君如透水月華波搖不散吳越間多詞宗
吾以爲叔田之後無飲酒矣樊榭天才軼舉靡不洽
習而志尙高遠泊于榮祿其與予同寓廣陵時當日
斜花外必相約爲倚聲往往予未及脫稿而樊榭點
筆已就予輒爲之罷去此卷中懷古咏物諸篇皆與

同里徐丈紫山酬唱者爲多予旣滯淫旅人生意消
削從塵土挈屑中手把是編恍鉛槧之周旋感素琴
於秋思傍徨弔影殆若異身有不禁爲之掩卷慙然
也康熙壬寅立秋日玉儿生陳撰書于正州之玉淵
堂寓館

余友太鴻秋林琴雅之詞質也靈虛學也膏腴才也
欣飛如玉光之陸離劍花之參差如是而命之爲詞
苟舍是其將焉如雖然猶有說夫詞南唐爲最艷至
宋而華實異趣大抵皆格于倚聲有疊有拍有換不
失銖黍非不咀宮嚙商而才氣終爲法縛臨安以降

詞不必盡歌明庭淨几陶詠性靈其或指稱時事博
徵典故不竭其才不止且其間名輩斐出歛其精神
鏤心雕肝切切講求於字句之間其思泠然其色熒
然其音鐸然其態亭亭然至是而極其工亦極其變
苟舍是無或取焉今太鴻之詞不必梳其貌蠟其言
抽其關鍵拔其轅轅上下五百年居然獨樹一標壇
矣余弱年從羨門侍郎竹垞翰林論詞嘗取宋末諸
家爲矩矱久竟棄去近與太鴻還往回理前緒不禁
蹶然一笑思效邯鄲之步也康熙壬寅清和月鶯籠

生吳焯書

歐陽圭齋謂雅卽雅鳥之雅以其聲能動物也詞之
聲生于宮羽而動物者必雅余與樊榭交垂十五年
見其偃蹇佗傒不廢文史而感時覽物託寓微至詩
所不盡必形之于詞上者海山縹緲之音次亦不減
游春綠水之奏聞者意消神往直與鄉先輩清真玉
田山村句曲諸公相後先矣符曾幼魯題

淡而彌永清而不膚渲染而多姿琬刻而不病格節
奏精微輒多絃外之響是謂以無累之神合有道之
器者詎止有井水飲處必歌柳七詞令市伶按拍稱
好乎意林趙信

秋林琴雅目錄

卷一

計四十七調

卷二

計三十七調

卷三

計三十六調

卷四

計四十調

秋林琴雅目錄

秋林琴雅卷一

錢塘厲鶚太鴻一字樊榭山民

國香

素蘭

路遠三湘向幽崖冷谷覓徧瑤房仙人鍊顏如雪尙
怯春霜玉戟參差搖翠返魂處多謝東皇飄零遇張
碩已謫紅塵還舞霓裳 月兮無限怨念王孫草綠
孤負空香冰絲彈徹清夜如訴悲涼粉指何堪摘取
除非是連理唐昌閒堦澹成夢白鳳梳翎寫影雲窗

如此江山

吳山望隔江殘雪

孤筇翼我登臨去江空雪晴風小溼粉樓臺釅寒城

闕不見春紅吹到微茫越嶠但半積雲根半銷沙草
爲問鷗邊而今可有晉時櫂 清愁幾番自遣故人
稀笑語相憶多少寂寂寥寥朝朝暮暮吟得梅花俱
惱將花插帽且第一峰頭未妨長嘯忽放斜陽玉龍
天際繞

百字令

丁酉清明

春光老去恨年年心事春能拘管永日空園雙燕語
折盡柳條長短白眼看天青袍似草最覺當歌嬾惜
惜門巷落花早又吹滿 凝想烟月當時餞簫舊市
慣逐嬉春伴一自笑桃人去後幾葉碧雲淡淡亂擲

榆錢細垂桐乳尙惹遊絲轉望中何處那堪天遠山
遠

西江月

靜極翻如有待眠多未是無慘柳花毵轉碧窗綃不
信東風纔到 閉月三三小徑藏鶯六六彎橋香囊
蟬錦嬾重挑乞取春愁閒了

真珠簾

雨夜汪青渠齋中看芍藥

疎寮自占藏真島棟風遲不覺花深寒悄背檻試懸
燈護幾枝嬌小振觸髣絲禪榻外是罌粟梢頭初好
相惱又香潤人衣雨聲吹到 深意不爲留春爲飲

盟吟社不教虛了舊種記銅駝料此情多少歸帔拖
霞休贈別便一任綠房迎曉買笑怕破霽簾痕添些
蜂鬧

疎影

柳影

輕陰冉冉正嫩苔弄碧庭宇深掩千縷柔魂搖蕩如
烟無端忽度闌檻章臺路暗人歸處看足了斜陽濃
淡又幾痕水際低窺近日楚腰全減依約勻梳月
底亂雲鋪滿徑籠住文簾欲結同心空試萸苗做就
三分銷黯寒添白袷長亭杳掃不盡隨風微歛最鏡
中再寫秋疎記得踏枝鷗點

惜餘春慢

戊戌三月二十二日泛湖用清真韻

綠徧山腰青廻沙尾幾信花風吹斷屏間鳥度鏡裏
舟移初試芡衫綃扇常把禪機破除難負春妍流光
如箭正蘅皋稅駕鞦韆塵不動黛明波遠看漸是弱
柳縈烟新荷鑄水麗景一番熏染已啼鶯後未噪蟬
前池閣陰晴千變誰道荒闌有人暗數年華自憐幽
倩且停橈淺酌恐惹霑衣雨點

天香

浴佛

櫻濕猩紅筍垂鳴綠今朝四月初八調御生時淨居
降處乍試銀盆珠沫梅檀沉水正小喚厨娘煎歇灌

頂身雲吹散盤盤洗出螺髮
年時暗盟重撥拜花
龕長生私乞心字濃燒屏底更衣香辣又是者番情
緒愛淡裏輕梳碧山抹寫幅金經小名自跋

臺城路

鬪

青萍葉大桐花落村村又鳴鳩婦細雨如塵穉寒若
水蟻動吳奩時候狸奴聘否恠生客偏憎閉門長晝
守定蘆簾三眠三起似人柳深窗幾日停繡挽籠
鉤陌上親費摻手夜屋燈邊曉牆烟外最怕銀篴饑
後心情迤逗記瓦卦曾占蒺山將就待設添梯更呼

隣女耦

又 前題

晶鹽水浴齊生日新排曲房深護纔細鬟梢忽圓指
節箔上低昂分貯一春心苦也不爲漂花怕他風雨
到得紅時柔柔龍眼已空樹 雪絲漫縹千縷試小
留蛹母配勾蛾父濕黛初描閒愁易結滿紙彎環眉
聚吳中忌處早繭獻雙功野祠簫鼓羸得秦郎碧窗
聽軟語 蠶二十七日而老謂之紅蠶出垞雅稱母蛾
父出荀子秦淮海集婦善蠶事故作蠶書

夢芙蓉 碧浪湖

曉天魚板響趁青蘋風起碧鷗波漲一枝增影斜裊
打雙槳道場山在望仲姬猶剩眉樣劃碎頗黎占蘆

灣柳汊新雨欲沉網 何處犀簾捲上白苧歌輕去
也終怊悵雙鬟可買應作五湖長水雲連浩蕩杜郎
原是疎放有日重來願身爲鵲鏡妝臉鎮相傍

邁陂塘

得舍亭婺州晚春見懷詩用蛺蝶岩韻答之

又騰騰一番春晚無情潮落江浦故人猶憶春前別
不肯載愁流去窗暝處展淡墨吳牋忽見殷勤語客
懷定苦在縠水雙流沈樓一角日日獨看雨 淒涼
意不數淋鈴督護風流那減張緒平生我亦多情者
更搯酒邊遺譜還問取問青子綠陰可記城南路休
歌爾汝待再覓郵筒餘花晚筍刻意爲君賦

玉闌干 金沙灘荷花

流金橋下清冷水記得小船曾橫浦風有意扇紅妝
先催放兩三冷蘂露翻荷背明珠墜算粉裊飄揚
似此去年花裏去年人空無言竚立沙嘴

滿江紅

鄭義門自號五嶽遊人索予題其紀遊
畫冊

爽氣如君駕千丈蕭森翠寒尋常肯塵中溷迹負却
屈子遠遊奇服在尚斗婚嫁此身閒記殘冬向
仙蹤無數山青代六玄嶽還登二室俯轅轅
遊幾癖寒下孱顏太乙風雲生脚底清涼冰雪
端詫明年又擬訪朱陵招紫鸞

又 錢塘觀潮追和晉北山堂

何處神鼇忽翻動，千尋銀闕乍龕赭。中間怒吼一痕
如髮倒捲青天吹海立，橫驅白雨連山發。被此聲日
洗勾吳淘於越，奇險勝瞿塘雪傾城。看中秋月
皇強魄至今驚絕隔，岍迴波搖未定西。興漁笛
歌想錢塘破陣萬靈歸，紛幢節

桃源憶故人

螢同陳玉几作

那更秋情獨冷燄，雨餘輕撲墜處濕黏簾。竹簷
山風逐穿烟照水猶難足，小簾窺入新浴殘月
剛移桐屋一箇牆陰綠

霓裳中序第一

朱德壽宮芙蓉石在南樵署

牆陰擁翠浪搔首繁華成俯仰
藤絡苔皴竹長是親見光堯蓬萊無恙
香銷玉葬怕夜深山鬼來往淒涼處
奉華舊閣記否捲簾賞惆悵秋蛩藏響
雨洗出嶙峋十丈芙蓉孤倚月
幌覓點額宮梅已歸天上冷
衙蜂乍放不照到銅溝鳳漲青蕪裏
宣和金字也是此情況

宋梅已枯

永遇樂

閨中秋

恨海誰填情天易老月共秋駐
秋半偏雙月圓却再減了閒風雨
井梧知信又開一葉羅薦較涼前
度想

沉沉青冥萬里此情此夜尤苦
殷勤露下把杯重
問也算平生希遇虬箭聲添鸞簫約爽不少傷心處
干卿何事清輝依舊更按桂花新譜便鴉啼紋窗影
轉怎生睡去

一萼紅 雁來紅

夕陽中正蕭蕭颯颯一陣打窗風黃木犀殘碧牽牛
歛天意妝點秋容漸商畧丹砂換骨扶碧篠渾學醉
顏濃怪石苔嵌疎汀水減掩映蒙茸
遙夜初鴻飛
度寄江南芳信月底相逢是葉非花將花做葉今後
輕薄霜楓爲最憐心情難老步微陰閒翫藥闌東寄

語相思。人道莫、誤題紅。

月華清
元夕同金小鄧賦鞦韆燈

水影吹香花光蕩月燭叢光影如許何處留仙便擘
皺裙留住栽畫架合傍星橋曳綵索還依燈樹飄舉
似輕身燕燕賺他遊女誰信巧如丁緩早貼就眉
鉤剪成腰杵送過牆頭疑是夜珠來誤憶舊日嬉戲
波心占盡了金明池路歸去有紅船次第更聞簫鼓

摸魚子

己亥初春過太湖次李秋堂韻

尙匆匆垂虹春早殘蘆風裏如語愁陰不散烟汀濶
一葉軟波翔舞扶柁去望練遶吳城幾點青旗字鱸

鄉社樹想霧鬢風鬟也憐寒峭淺翠照眠鷺 千年
事零落荒臺古墅乾坤原是孤旅漫臨奩鑑驚清影
客子何堪塵土須小住看重疊雲衣裘就湖天暮低
蓬葍浦續漁具因緣茶人滋味休寫斷腸句

又

宛陵梅文常爲予寫西溪卜居圖因題其上
兼懷尊人桐長先生

問誰移亂泉一曲藤橋宛轉河渚青羅簪髻看皆好
羃屨斜遮疎樹橫斷渡指牒子如鳬小槳輕搖去蘆
花深處笑蟹斲魚牀何時料理始有此家具 平生
意瀟灑愛山真趣年年踏徧烟雨百弓沙嘴閒田地
輪與眠鷗翹鷺呼燭語仗濃淡香螺寫出無聲句故

人間阻更長憶梅翁小溪春穀獨速短蓑舞

應天長

年年不到湔褰水懊惱越梅猶病齒智瓊娥飛燕姊
勾掠鬆蟬知舊事小長于千萬里枉說門前梧子
又是孟婆風起熏香偎翠被

浣溪紗

奔牛道中初晴

莎雨前宵打布帆柳花今日撲征衫催春杜宇怨春
酣天有心情雲破碧風無氣力水按藍銷魂時節
在江南

八聲甘州

京口

閱興亡多矣此南徐我今逐沙鷗過建陵草色練湖
柳影春事都休好似秋容慘淡吹笛夕陽樓樓外茫
茫水著箇扁舟綠髯看山未老縱凌雲意在漂泊
應羞喚玉龍起舞爲洗古今愁最忘機不如漁子向
晚來和月一竿收聊同宿江烟江樹也是風流

揚州慢

廣陵寓齋芍藥同程松門陳楞山賦

疎雨催妍餘寒釀恨天涯相見魂銷問春歸幾日未
盡減春韶算亭北新妝老去不多風露暗展輕綃送
杯中婪尾香心欲話無聊鷗黃初試記當年曾識
烟苗奈月幌低籠雲堦斜倚夢到迢迢除却謝郎俊

句無人與淺暈深描想難禁攜贈離情都在紅橋

邁陂塘

荷錢

皺微波紫屏風外翦根絲脆初裊田田點點黏天影
不覺千紅如掃縈網藻訝水蜨翻衣只認鯨文小碧
圓多少問覓藕何時見蓮幾日難買越溪笑風亭
畔曾約玉纖親拗未堪低障斜照鵝兒欲啖清光破
偷眼依稀同調空懊惱誤釣線穿來在費江姝巧疎
簾興好待鈿扇高擎象筩半捲卧聽雨聲鬧

鯨文古
錢名

探芳信

廣陵雨夜同故人徐紹武汪抱樸集飲
于許渭符獵微堂以藏花爲令各大醉
明日抱樸將歸武林矣

冷雲墮苦燭暗梅霏堦喧蘚破約舊愁今雨安排醉
鄉可風花身世渾無定揅向花稠卧儘淋漓帽落青
枝殘搖紅朶珍重此間坐要句泊心旌琴開眉鎖
還剩杭州衣上酒痕浣只憐曉漲金焦外弱柳飄然
過照相思一點蘆中夜火

祝英臺近

黃薔薇

軟屏深香霧重春已欲歸去短刺鉤春更剪柘羅舞
幾回惹却斜陽蒙將初月但吹送麝塵侵戶水邊
路柳花褰冑柔條相看色如許點染齊紈添了小鶯
語故人昨有新詞殷勤盟手曉傾下金盤仙露

滿庭芳

惠山寄暢園

屋借峰圍徑隨泉改過橋別是深清闌干十二真在
鏡中行不道黃衫去久風前樹猶帶茶聲江南好菟
裘似此何用買傾城携朋春已謝梅九緘怨蕉紙
書情任陰陰隔葉啼老吳鶯明日片帆催發幽崖畔
正有雲生勾留住簾紋設否容我聽捥箏

尾犯

賦新蘆

水空雲淨見菰蒲叢外數枝交映梢梢瑟瑟無人處
被荷風吹醒搖波十里遠界破青山影做秋聲不到
秋來要君倚檻閒聽最是淡烟低暝逗漁燈前浦

冷便移栽蕩戶添箇根邊鳴雛游泳捲葉鳴笳揉花
裝被尙遲清興又何似折取橫江相思還踏三徑

清平樂

陳楞山松泉試茗圖

空烟吹翠峰腋雲生細消得清涼剛斛二勾破松根
多睡 幾年淮左羈愁何時嘯侶林丘記取雪殘歸
棹期君第二泉頭

臺城路

懷下若舊遊寄金壽田

船窗涼燭分攜後夢遊未忘清遠柳髮垂溪山螺過
雨陳帝宅邊曾見吟情恨淺但共坐深宵忍辜茶盃
誰料今年又憐梗跡在隋苑 蘋洲那時初返笑風

流不減綠陰春晚月墜江空雲籠岫小無復焚香書
練憑高望斷悵如此幽尋頓成星散待續前期葦間
誰是伴

玲瓏四犯

鄒正叔西湖汎月圖爲玉几賦

寒玉砌瀾修蛾橫綠青天明月初湧人間今夕好柳
外涼陰重沉沉兩堤跨竦問何人曲聲吹送酒面邀
秋船頭照影吟思欲飛動烟空遠眸堪縱想菱颺
亂起荷氣深擁悠悠驚易曉光景隨塵鞅南田詞客
今仙去剩圓魄佳時誰共沙鳥夢無端寫閒情數種

水龍吟

用丁宏菴韻

客懷最恨秋陰故來遮斷闌干影蛩欺人獨鵲欺書
滯何曾忼聽疊疊吳雲迢迢楚水悠悠醒枕漫尋思
那日門前銀浦不抵似關山永凝立風簾露井可
能揅參差簫冷飄零愁髮蕭條長鈇無言自領樓月
斜初篝烟清後舊家標韻又新涼陡起添衣時候做
西窗暝

賣花聲

徐翩翩墨蹟扇自稱金陵蕩子婦

花月秣陵秋十四妝樓青溪迴抱板橋頭舊日徐娘
無覓處芳草生愁金粉一時休團扇誰留殢人只
有小銀鈎句尾可憐書蕩婦似訴漂流

采桑子

晚秋同程松門江研澗汎舟紅橋登平山堂

重陽過也成虛負
賴有詩仙肯作延緣人
與黃花共一船
沿堤轉盡垂楊路
水影橋邊山影樽前畫出
傷秋雨後天

惜紅衣

賦團扇上蓮草美人

月裏盈盈風前轉
轉嫩涼吹送細熨桃鬟羅衣淨無
縫束牆未見容易得情田先種飛動輕削楚腰比桐
花么鳳天然壓衆愁
眼啼蘭無言正如夢
纔離小草半面漫邀寵
別有寸心通處拾翠水邊曾共怡恁
時憔悴湘簾畫屏深擁

秋霽 金山寺

樹影中流走萬里江聲地軸吹轉香塢擎秋翠蓬穿
水人別開宮殿古臺一半倚空闊盡魚龍變客思
倦長是潮生風熟布帆遠回首悵望北固南徐六
朝銷沉鈴語悽斷問何如還留玉帶禪心孤月鎮相
伴清曉碎霞飛近岸郭公墳上日日暗露沙痕撈搖
驚起叫羣棲雁

向湖邊 拜句曲外史墓

菌閣烟銷笈樓塵鏤片片冷雲疎木人似秋蟬渺餘
音空谷恍昔年吹斷瑤笙寥天回首凍草此時纔宿

風剪蓉裳恐難禁幽獨 歸去瀛壺便覺吟朋俗誰
再倩好手圖孤清冰玉一任香狸竄殘碑深竹理哀
絲漫鼓懷仙曲還如倚三尺細泉看夜綠遼羽重來
笑飛光何速

如夢令

庭下丁香千結

毛文錫

青鳥不來愁絕

唐昭宗

無語倚屏

風

李珣

正是銷魂時節

毛熙震

離別離別

韋應物

惆悵曉鶯

殘月

韋莊

翻香令

題趙意田倚樓圖

斷雲依水晚來收

辛幼安

幾行征雁下汀洲

趙旭

江之外

吳山之麓王特起好江山何事此時遊周審醉香空斷

楚天秋馮子振故人多在玉溪頭元好問尊前月沈會開

遙笛呂渭老這風情都屬趙家樓黃昇

高陽臺題華秋岳橫琴小像

劍氣橫秋詩腸滌雪風塵湖海年年三徑歸來慵將
身事戔天草堂不著櫻桃夢寄疎狂菊礪梅邊想清
遊如此鬢眉如此山川枯桐在膝冰徽冷縱一絃
雖設亦似無絃世外音希更求何處成連幾時與子
蘇堤去采蘋花小艇衝烟笑平生忘了機心合伴鷗
眠

探春慢

孤山訪梅

清淺湖波回環孤嶼落日空亭凝碧凍鶴無聲衙蜂
罷開忽有苔枝橫出留取古時香渾不是古時春色
過墻料峭風來吹花開了還側何意相思今夕看
似淡如無半闌疎白睡起推篷酒醒聞角消受高人
吟癖水月更交光仙袂在玉壺塵隔禁住新寒幾生
纔此修得

三姝媚

櫻桃花

嬌鶯含得未正眠燈風收繁心低綴薄暈微頰學玉
窗勻面粉淹脂淚悄探芳期先占了沿溪桃李無語

銷魂偷折斜枝下堦游戲 忍觸蜂鬚飛墜到細數
圓珠好春流水翠沼深深照一庭隴月暖香吹碎記
挽單衫迴半盼難醒殘醉隔著重簾花下鶯鶯嬾起
李賀詩背人不語向何處下堦自折櫻桃花元稹詩
猶帶春醒嬾相送櫻桃花下隔簾看

沁園春 塵

微步凌波清歌繞梁凝芳暗低記羅窗未拂簪花偷
學鈿箏初滿藉草慵攜依約爐邊悠揚簾外欲辟還
宜舊導犀風尖甚上平臺望處眼纈都迷 浣衣苦
費柔荑正願効輕微安足辭笑軟紅碾玉橘中戲賭
深黃篩麴柳際斜垂擣麝成香逗烟生綠硯匣封時

句嬾題銷魂也覓去時蹤跡休掃桃蹊江夏王蕭鋒窗塵未拂畫
塵上學書見南史樂器塵滿見隋書沈約有辟塵爐
韓偓詩紅簾不受塵石季龍有芳塵臺鄭源婢萱草
浣衣云郎君塵土太多令人手皮俱脫賸賓王咏塵
詩願言心未翳終與効輕微橋中叟賄玉塵三百斛
麴塵深黃色也溫庭筠詩擣麝成塵香不滅李賀詩
薇帳逗烟生綠塵柳宗元詩硯匣留塵盡日封韋莊
詞去路香塵莫掃

曲遊春 郊外探春作

一水仙源曲被柳條遮斷千縷婀娜衣待前香怪逢
伊還向重簾單舸出意新梳裹看颺髻蘂黃微澹縱
近來遠似天涯誰倩玉顏初破 禁火心情偏妥伴
錢藕偷分釰荇輕墮容易斜陽恐穿烟鳳子尙尋珠

墜波面虹橋卧任怨咽玉簫吹過無奈澹月籠燈翠
屏恨鎖

秋林琴雅卷一

秋林琴雅卷二

聲聲慢

題符幼魯風雪歸舟圖

征衫換色客枕催寒川塗自古酸辛楚尾吳頭風雪
獨自歸人低迷凍鷗片影恐吟魂攪亂江雲遠望外
壓敗蘆斷竹何處孤村莫怪蒼山白首看淒清到
此愁也如君濕重帆遲贏得畫裏閒身灘空夢回犬
吠正鴻妻相候柴門待歲晚酌椒花全未是貧

蔦山溪

鄭菊山翁諱起卽所南之父有木南半
隱在清波門外長橋

湖南深曲元是漁樵社欹壑架長橋綠陰中幾椽秀
野今來惓悵不見岸烏巾衣砧沒釣船空牧豎收羊

馬 風蘭幾葉應看佳兒寫古月墜空山似飛來冬
青樹罅無多半隱幽意自乾坤休凭弔半閒堂螢火
明秋夜

清平樂

風梭織雨萍葉籬根聚水滿蘭橈應斷渡昨夜夢魂
來去 春衫起樣休寬偷描一一輕鸞將息釀花天
氣憑他料理餘寒

一枝春

梨花初落

縹蒂無多過清明幾度東闌愁凭飄搖蝶羽漲綠乍
逃天鏡微開柳眼似相見雪融酥凝揀早趁深淺沾

春護取夢雲輕冷
聲聲鶉鴂催暝憶初籠香雨烟
綃娟靚紋疏月小瘦減玉兒妝影憑誰看繡好留向
象牀低暎還帶葉偷綴瓊絲晚風未肯

憶王孫

懷紅橋舊遊

小秦淮映小紅橋蘭舫重來酒未銷秋雨如塵沙外
飄夢迢迢曾倚闌干弄柳條

丁香結

暮春初霽用清真韻

吹落嬌雲展開平碧枝上雨殘猶隕恨流光偏迅數
景物剩得鶯愁蜂潤小紅曾記否朝醒殢薄寒自忍
可憐遊舫散後定是蕪菁開盡相引早餽飮陰晴

花信催過幾陣山巷幽坊柳絲竹粉翠樓生暈謝家
飄蕩紫額剪麴塵盈寸憑闌干那曲冶葉何人摘損

祝英臺近

蛙

鴨頭搓毳腰染鼓吹開南浦呌暖喧晴似把好春祈
添他一兩三聲荒塍斷港爲幾陣清明時雨 苦無
主最苦別館華林跳梁小池聚到了燈昏掩重門深
戶漫勞閒聒空塘忙催春老又黃却菜花無數

高陽臺

湖上感舊

野水垂楊古牆蒼薺傷心清淚偷沾前夢無憑閒情
曾過鶯簾狂紅只在西湖路記來時月細風尖最情

吹同問青旗同譜烏鹽 酒人轉眼多星散任塵埋
蠟屐網褰書籤能話相思憎他雙燕呢喃平生不信
潘郎髩到而今髩也絲添更厭厭葉暗空庭雲墮晴
簷

天香

龍涎香

苦竹潭深枯桑島遠靈姝秋卧無味袞霧醒初戰沙
去後剩得唾痕凝紫魚衣試採重與和宮奩花水天
上梅魂乍返溫磨似垂纖尾 并刀斷雲暗遞認分
明蜃窗燈穗一縷閒情如舊煖金難寄焚出青蘆雨
裏伴小舫涼聲靜敲碎松石圖閒餘烟半紙

霏雪錄
尤溪縣

西苦竹潭中多龍涎梁四公記洞庭山南龍穴通枯
桑島雲林遺事倪元鎮爲催科所擾逃去匿菰蘆中
焚龍涎香柯敬仲詩云夜雨推篷寫松石焚香何處
獨題詩蓋紀實也

摸魚兒

尊

過清明第三橋畔香鈿半漾平碧纖痕雉尾浮青紫
漫把露葵呼得忺小摘有盪槩人人萸玉嬌風色葉
圓似拭正觸撥柔情千絲萬縷到手不堪織 前期
遠曾共飄零詞客酒闌羹送冰液沈郎自許能知味
千里還伊吳食秋思寂但望斷鷗鄉烟外愁何極幾
時肯憶笑鱸斫蓬池不如水際采采趁今夕

齊天樂

蟬

河林響接炎光永垂綏不沾塵土刻鈿仙形貯風清
腹笑倒世間兒女疎枝過雨又咽斷殘聲暗移深樹
涼碧勾雲高情那信雀相妒曉園莎露乍滴問何
人咏得一剪輕羽趁夜潛飛臨妝欲動好助綠窗眉
嫵長嘶正苦憶舊日瑤宮孟家曾顧淺畫生衣冷
飈吹不去元祐孟后衣画雙蟬目爲孟家蟬見可談

又前題

一番枝背旁鳴起池塘頓添清絕竹翠捎空梧陰避
景占了嫌涼時節偏驚遠別是催落殘陽又催殘月
獨韻么絃更無人爲表孤潔桃笙夢回靜聽每星

河夜淺餐露聲。螢火伏驚柔竿漫試吟。到秋來悽
切西風再熱候。綬冠兒舊愁重說。剩有癡情繞堦
尋翳葉。荀子。耀蟬者務在明其火。曹植蟬賦。怪柔竿之冉冉。冉冉兮還微。而我經之冉冉兮還微。

水龍吟

白蓮

綠羅萬笠高低姑。山雪擁橫塘路。鉛紅浣褪。娟然幽
意最宜。涼雨葦亂萍疎。銀囊獨立。羽衣來暮。襯鱗鱗
波底。魚雲粉朵如明鏡。添妝處。多少輕舟。溪女歎
年時。嫩瓊誰主。襜褕開徧。滿陂照影。舊遊懼阻。香遠
堂空。舞綃零落。含悽無語。念玉笙纖手。與花一色。浥
殘清露。淳熙九年中秋。賞月香遠堂。池中植千葉白蓮。上皇召小劉妃獨吹白玉笙。霓裳中序見。

武林舊事

桂枝香 蟹

江楓落早正執穗侵星
滕畔爭擾不住腥泥郭索
臍翻紅蓼疎簾半映圓沙
細聽燈邊雪聲鳴曉漫愁剪
網骨清沫白葑湖秋好
憶月底糖霜乍擣會吟侶
筠窗擘時寒小翠菊分香
洗手盡消樽醪何年化石
波飄出溢金膏故國天杪
枯梢無數依稀粉本尙留
纖爪咸淳臨安志西湖葑田產蟹謂之湖蟹本草蟹入洞穴年深成石蟹畫家有蟹瓜樹

瑤花

東風薄劣墜粉吹香又去年
情緒高城亞字烟淡抹

尋到笑桃門戶扇羅風小憎半掩銷凝眉語料生來
千媚中央解唱瀟瀟微雨促人纔解頰陽悵一片
吳波堪斷腸處黃鸝巷口可憶否舊日崔紅曾住綺
疏天遠便不管雲昏月苦縱他時重問芳遊迷却綠
陰歸去

夏初臨

初夏雨中同蔣丈靜山汎湖

蘸就魚天搓成鷗雨空濛撥棹遲遲無數蘋花輕香
點破漣漪微風掠岸斜吹濕青蓬誰弄參差湖心亭
柳千條映波正是愁時可憐春去追送今朝破除
酒病更鬪槍旗簾釘窗眼曲遊俊侶都非那不淒迷

放殘陽綠過橋西記蘓堤衣香別船柔楊枝枝

燕山亭

唐開成陀羅尼石幢在龍興寺 幢爲處士胡季良書埋地中已久下有舍利

五十四粒崇禎丙子忽放光掘得之都穆趙岫諸人所未見者也同徐文紫山賦此解俟好古者采焉

劫化荒磷風齧怒濤香界尋常都捲科斗字殘蜥蜴
碑沉故物武林稀見怪石能言夜光迸天陰深院奇
幻比雪後峨眉佛燈吹徧 追數甘露初過又唱出
翹翹上林花亂剛紀二年忽涌青幢銀鉤刻來四面
讀罷蒼涼無片語可銷征戰堪歎聊拓取學伊懸腕

花心動

玫瑰花

無力縈烟馬塍邊晴飄夾衣時候疑是紫雲濃笑妝
臺幻出綠叢微瘦粉心黃顫鮫紗膩愛香韻年年依
舊爲花惱芬氤一縷破禪銷酒巷陌侵晨賣否常
暎竹斜門幾聲初逗髻壓退紅鏡點殘粧休傍辟塵
釵溜泥金曾拂宮人帶歎今日佩珠何有翠陰裏徘徊
撚枝在手

梅子黃時雨

蠶豆

誰種南山又蛾麥弄涼鳩甚分醉記似雪花開斷畦
連綴家近羅敷墻畔煮香暗透茅簷底三眠起小樣
翠籠添了蔬羹應是幽風詩意便新茶繡飣柔莢

猶細待和飯調酥
揀花盈地殺菽霜
飛燕塞遠苦相
思有江鄉味青堆市
幾人買絲溪尾

滿宮花 細雨

看成烟吹做水低盡春陰垂地
霏霏拂拂又濛濛不
是養花天氣 濕透子規聲裏人倚疎簾無味
晚來幾滴枕邊聞如在空江船尾

邁陂塘 書帶草

倚閒窗纔題倒薤堦前柔綠栽徧離騷自古多香草
愛爾紛披纖軟還摘看似當日泥中人把并刀剪移
根偏遠總謝客池邊鄭公鄉裏一樣露痕淺 東風

護野火何曾燒斷年年生意流轉上闌不入羣芳夢
且學青絲低綰箋注倦笑兒女尋常也識詩名賤茸
茸何限對遠志猶存忘憂早樹留取映書卷

又 仙姥墩在清波門外聚景園相近

水中央一亭浮遠風楊遮斷城角餘杭阿姥當壚任
景物眼前如昨思小酌只釀法無傳空負方平約玉
蓮杯弱更喚取花姑調成花液當了萬年藥 人間
窄除睡醉鄉堪託沈腰何事愁削仙山樓閣多塵劫
况此綠陰門鑰休冷落自游戲壺天謾使癡兒覺春
衫香薄攜蜜炬三條蘭醪一斗同唱夜飛鵲

滿江紅 題桃花扇傳奇

千古南朝剩滿眼鍾山廢綠問誰記渡江五馬玉樓
金屋復社尙興風影禍教坊偏占烟花福笑無愁帝
子莫愁湖懽娛速 醉舞散灰緋燭宮騎走降幡蠹
看湘東已了枯砮殘局桃葉渡邊飛燕語桃花扇底
銅仙哭算付將此曲雪兒歌難終曲

探春慢 宋宮洗鉛池在梳妝臺側今爲僧院

鳳去山枯鴈啼月墮東風吹瘦波影脉脉流香亭亭
浸玉空對琉璃明淨花片魚銜得縱還有脂痕誰省
幾時鎖却妝臺回頭鄉夢無定 白雁來時秋勁早

淚滿碧紗塵暗清鏡楊妹詩如劉妃笙脆往事十分
淒冷未浣深沉怨謾汲取頻煎茶鼎換了空門孤燈
春雨鳴磬

霜葉飛

九日葛嶺用夢窗詞韻

最愁秋壑堂前徑秋蛩秋草秋樹雁雲無力護微霜
捲盡平湖雨愛此會清觴泛羽君看殘菊皆千古歎
舞燕歌鶯但博得銅駝恨事枉費毫素 同是鄭客
迷蕉風埃牢落醉中休倚能賦欲從勾漏訪丹砂挹
袂聽仙語凭小閣香生幾縷飄颻容我吹笙去謾再
尋西峰頂喚起金蟾海天空處

瑞鶴仙

咏菊爲楞山生日效蔣竹山體

林臯寒近也看麕眼籬根菊錢圓也鱗鱗雁雲也又
霜花淒緊放秋歸也冰泉引也望南山烟嵐淺也自
義熙開後重陽甲子幾番題也遊也傾壺細泛冒
雨幽尋足清娛也天隨子也和紅杞采將也笑桃鬟
杏靨爭春烘日不似潭花壽也祇金衣黃鵠多情舞
裳伴也

江月晃重山

月夜渡錢塘

江上已收白露月中微辨青山江如羅帶月如環乘
風去江月在檣竿記得瓜洲問渡舊遊光景重看

客心鷗夢兩般閒涼烟外一抹固陵關

高陽臺

蓬萊閣望海

雲斷山痕天黏水影望中何處蓬萊奇絕殘秋茫然
對此浮杯祖龍可是慳仙骨甚西風不送船回最堪
衰老却扶桑忘却誰栽而今社鼓斜陽裏已湖虧
舊鏡梁換新梅一朵青紅虛空那有樓臺琴心賦筆
看俱嬾洗崢泓襟抱全開白無涯月又初生潮又初
來

蘇武慢

謝疊山先生贈家半村先生詩真蹟卷

七年進士仕爲烏程縣尉遷著作佐郎
入元徵聘不就隱居以終此卷今藏姚

江族人處

朱鳥歌殘白翎詞起天地一家春別霜凋玉樹風折
瓊花只有野梅高潔曾憶故人拂袖歸來暗霑清血
又燕臺塵杳曹碑魂斷夢尋薇蕨江上路冷菊空
籬疎燈破屋長記義熙時節琅琅夜誦滿紙驪珠驚
說半天虹月應是怕伊鬼泣龍愁巧偷豪奪放扁舟
西去從此相思晉雪

臺城路

上虞百官江口舜廟

重華不見蒼梧遠西風忽吹人世苦竹荒濱冷葵簪
井那有窮蟬苗裔翠峰相倚恍二女明妝含顰長是

日暮神歸村簫聲歇陣鴉起
江東客心悽絕渺餘情
飄入湘月湘水鳳瑄雲迷
龍裳雨壞後五百年何
事欲行且止漫拂拭殘碑
古香難洗紅染楓天灑空
千載淚

滿江紅

曹娥廟

簾捲冰綃開面面軒窗貝宮有越上采蓮兒女來覓
遺蹤飛楫浮江仍競渡畫衣拖水似凌風佩明珠若
箇許同遊孫媚容
花舊在紅處紅紛屢舞列歌鐘
忽霏微靈雨遠浥千峰收釣客歸山色裏讀碑人立
暮烟中望青林一帶隔潮痕都是松

唐錢塘孫戡八
月迎濤船覆死

戩女媚容巡江哭以瓜設祭投江抱父屍出事見文苑英華

蘭陵王 三高祠

冷烟濶笠澤茫茫釀雪垂虹畔搖蕩素波鷺入蘆花
雨明滅枯沙抱斷袂清絕風船唱歇殷勤問如此水
鄉定有飛仙弄華月黃金鑄重活自一舸飄颻忘
了吳越秋風又到愁時節拋洛下秦地貴遊無夢尊
香茶熟味最潔笑名是何物騷屑漫晞髮厭格鬪
蝸巢相响魚沫青山今古銷豪傑愛釣雪亭外釣絲
風刷翺翔無所洗眼望翠佩憂

江城梅花引

扁舟如葉過紅橋雨蕭蕭雪蕭蕭樓外闌干闌下廣
陵潮一夜官梅開欲縱野梅發送將行伴寂寥 寂
寥寂寥碧雲高飲未豪吟未調寄也寄也寄不便南
雁程遙憑仗空香吹入玉人簫彈與北枝花上淚千
點點有東風不肯消

釣船笛

韓侯釣臺下作

清角起淮城寒緊拍天風浪底事不留英傑笑乃公
將將 枯荷野鴨小洲前却愛釣絲漾何似客船吹
笛過南昌亭上

淡黃柳

賦曉色

河斜月淡咿啞鄰雞急遠夢初回窗影白纔辨鞭絲
帽帶催起勞勞早行客 度阡陌烟中樹如織何人
破新霜跡料梳樓倦眼開難得一路惺忪半村微亮
腸斷玲瓏唱出

淒涼犯

十二月二十四日宿濟南鰲陽店寒甚
同倪子珍賦

栗林宿鳥柴門裏凝塵半榻誰掃倦程繫馬風刀裂
酒雪花欺帽何時古道看長倚鰲山翠小漸燈昏寒
星照戶不使客愁少 欹枕尋思處劃句爐閒印梅
窗杳歲殘氣味歎詩人在家貧好底事飄蓬竟輸與
蛾兒夜闌恐明朝驚看髣髴似暗老

慶清朝慢

長安元夕同王雪子陳楞山金繪友集汪西亭水部寓齋賦

掃雪燈樓障風酒幕千門春散京華閒情似夢小歡
深醉銷他莫趣走橋人去故園伴侶在天涯當杯有
一般好月燭影初斜 簫鼓隔牆未厭况水曹詩俊
淡墨棲鴉疎香共感窗外應少梅花從此滿城鬪草
細娘催上卓金車心期遠鶯邊古寺雁外晴沙

秋林琴雅卷二

秋林琴雅卷三

倦尋芳

揚州與江佩水別三年矣辛丑春日在都下重見于程蓉槎齋中話舊悽然因製此曲

水萍不定烟月無端人海逢又曲曲萸灣空老那回
楊柳十二街中燈過五十三樓上寒銷九數年華但
簫沉夢遠鏡窺吟瘦共細乳分茶清晝門外塵緇
儂定能否淺碧西山贏得此懷如舊相見猶憐雲聚
散相思應在花前後似分明話秋池雨窗時候

花發沁園春

瓊花觀春宵小飲

柳裊新裁杏開初嫁竹西自古隋苑因風側帽借月

窺簾九里繡街行半青旗影轉攜酒訪深沉瑤殿正
扇暈寒拂飛鸞釵光明動棲燕 可惜司花不見繞
無雙亭前細訴清怨香燵玉悴雨絕星移十二畫闌
天遠傷心未慣聊一醉問春深淺念草草約伴籠燈
吳船江上歸晚

聒龍謠

虎丘

髻影春船鈴風午樹一徑松門苔繡北去南歸殢幾
番歌酒聽歌侶畫壁無蹤覓酒伴卷波非舊祇年年
小泊情懷渾相識半塘柳 吟邊石望中樓罨歷亂
墜絮拋殘芳晝客心孤迥更闌干垂手過清明尙未

還家問燕子定巢能否者些時吳水吳山盡成迤逗

蝶戀花 題杭堇浦鵬紅集

一片東風吹艷雪錦瑟如人忍使華年歇夢去青溪
溪畔月洛神休寫王家帖 非霧非花疑剗襪楚客
多愁鳳紙新來絕落葉依枝飛又怯秋奩空羨泥金
蝶

百字令 表忠觀懷古

雲旗風馬見蚪姿髣髴英雄徒步啼得羅平妖鳥盡
自向錢塘開府玉冊樓高錦衣城壯百萬貔貅駐江
神心折廻濤先避强弩 休說朱五經兒東南霸氣

三世偏能據天遣山河都姓趙拱手還歸真主麥飯
空祠柳圈寒食緩緩歌遊女蘇碑仍在眼前龍鳳飛
舞

霜天曉角

華秋岳松月圖

查牙老樹記得何年過攢出翠鍼千百是妙手新栽
處過雨涼月吐紛紛清影舞孤鶴不成秋睡又翻
下半空露

南樓令

醉仙圖

無夢到槐柯蓬山自踏歌酒逡巡頃刻花多有酒有
花吾事辦呼冷月出滄波落珮任顏酡壺中一太

和儘長年銷得娑娑便道老仙真箇醉人世醒待如何

沁園春 心

一寸通犀脉脉難窺含無限情記鍼纔棘刺捧時尤
媚鎮餘銀液捫罷偏驚小恰容憐芳能颺恨莫近彈
碁最不平羅襟掩歎幾曾灰盡半爲琴聲覆蓮狀

不分明愛慧性玲瓏在目成乍懽娛著處忤如危柱

別離催就亂若懸旌門裏輕挑秋來暗合閒悶閒愁

特地生花前見算除非換得方表深盟棘鍼用顧長康事李賀詩

銀液鎮心松子華子心狀如覆蓮黃庭堅詞爭知我
門裏挑心吳文英詞何處合成愁離人心上秋願負

詞換我心爲你心始知相憶深

喜遷鶯

初夏

竹香新引漸綠到池東茶縈吹盡描繡心慵行棹聲
歇長日瑣窗清潤閒臨小風揮扇涼思先歸鬆髻爲
誰瘦軀單衫尙束春前閒恨芳信緘密意蠅字玉
釵待插榴中間鬪茗樓前澡蘭屏底猶記那回眉印
幾絲麝煤飛度山枕天涯翻近夢催破聽迎梅雨點
敲簷初緊

玲瓏四犯

南屏和徐紫山韻

九疊匡廬恰宛在湖南松雨新染畫出青紅斜照玉

橋山展隨意捨却划船指竹尾數峰遊徧聽下方鼓
笛聲來穿塢冷雲遮斷暮鐘初起僧歸遠碧玲瓏
有人勾管重尋涼水崖碑在零落釵痕蒼蘚還問劍
長埋一例魚燈吹散唱夜涼山鬼紛萬古騷情亂

八寶妝

孔雀

影初成花屏未落只傍瘴烟腥雨萬里攜來闌檻
空又采愁他相誤金盆新水一泓地錦安排濃春時
翠舞誰惜明妝圓翠矜誇兒女暗憶篴竹叢
外鷓鴣啼殺舊樓知在何處怎肯供榕陰珥戶且聊
整閒任待升却聯拳左距莫迷秦客蹇芳路正

貝葉香清佛鋪有日歸依否鹽鐵論南方以孔雀珎門戶鄧椿畫繼宜和殿
荔枝結實孔雀在其下召衆史圖之各極其思華采
然但孔雀欲升藤塹先舉右脚上曰未也孔雀升
必先舉左

掃花遊

白石蓮花燈

寒夜迥正裊鬢茶烟一枝斜颭玉餅數皸勝驪山
床就暖泉平汎水月分清葉葉釵頭乍歛最淒黯是
霜苦校書虹冷談劍 升降吹素艷恍照破秋心滿
懷蕭澹六時漏點更東林夢去岫深苔掩絳蠟啼香
幾許風情自感小凭檻捧重臺妙明無染

金浮圖

元中峰禪師遺履在雲居寺

松門碧千秋講席不借猶存素約如昔想高僧定後
工詩筆養就新篁自具參天標格踏破山青雲白雙
趺解處游戲何人識 蛛網積堂空磬寂未墜真風
笑他留隻茫茫大塊同爲客回首連昌蘚暗文綦跡
幾緗軟紅可惜攜看過午葉響烟林側

高峰謂師是
竿上林新篁

三部樂

流求紙

瀛海荒唐訝未識蔡侯素濤懸影一簾花雪輕揭煩
他文頸早傳徧山北山南坐闕鏤樹底石几鋪淨碧
環島女可有譯書題贈 坑灰昔時乍冷說先秦采
藥襍牋誰證鬣帋又移近浦星槎風定展松紋乍磨

翠餅須分寫歡斯異境身世似粟蓮鬢外天水遙永
歡斯流求族姓也

水調歌頭

訪吳丈志上寄老菴

撫景不自得奈此綠陰何試尋北郭隱處亭角掛烟
蘿門裏簾櫳如鏡門外帆檣如薺靜躁隔無多夫子
一丘壑舉世盡風波枕琴眠看雲坐采芝歌老來
苒苒奚事圖史日摩挲與我周旋作我不恨古人不
見鶴髯任教蟠蟬亦愛清境流響出庭柯

澡蘭香

五月一日皋亭山下競渡

霞翻浦樹雪濺汀蓮疊鼓彩虬欲起梭船貴買鏡檻

先開盡逐鬧竿游戲定何年
鳬羽凌波風光留人似
此打扮杭州十里銷魂烟水
棹轉盤渦更險爲憶

山前受降遺事花釵剪艾
麝粉吹菰越女但知沉醉
瞥回眸衆裏盈盈行雨防
霑羅袂念散後夢繞湘雲
涼慙新睡

宋黃公紹競渡權歌朝了霍山朝岳帝十
分打扮是杭州

邁陂塘

題洞庭龍女圖槩括湘夫人辭

白雲來洞庭渚北雙眸眇眇愁予
秋風乍嫋層波遠
木葉飄飛如雨期又阻獨騁望蘋中
不見巢青羽相
思欲訴悵澧有紅蘭沅生碧芷公子
杳何處朝馳
馬忽向江臯羈旅佳人邂逅低語
未能騰駕偕烟逝

築室水心如許蛟瘦舞算只在椒堂荷屋香蘅宇襍
遺南浦看霓帶續紛九疑迎得聊以共容與

金縷曲

自燕和紫山韻

掠影分池面訝今年社前初到練拋雙剪珠館何時
歸去後不定翩翩風顛還細認謝家深院却怕芹泥
輕浣得舞爭高月底依稀見銜墜絮舊巢伴 倚紅
杏處花微歎恁休誇烏衣輕俊羣遊非慣飛上銀旂
相比竝已別春溫爐炭簾下誤玉人低喚莫是灞橋
寒尙在阻鈿車寂寞音塵斷看弱羽帶流霞

雪獅兒

咏貓效竹垞翁體第二句與原作小異
依書舟律呂也

雪姑迎後房櫳護得黃晴明潤撲罷蟬蛾更弄飛花
成陣穿籬遠近未肯傍茸氈安穩念寒夜偎衾煖處
夢尋燈暈繞膝聲聲低問似無魚分訴憐伊嬌困
展膊屏前髣髴三生猶認懷春堪恨漸取次歸來難
準瓊籤盡上案晴蟾鋪粉白雪姑貓名見清異錄宋
葉紹翁貓詩醉薄荷撲蟬
蛾見隨隱漫錄宋張良臣山房惠貓詩從來憐汝丈
人鳥端正銜蟬雪不如江海歸來聲繞膝定知分訴
食無魚又祝貓詩江上孤蓬雪壓時每懷寒夜煖相
依從今休慣穿籬落取次懷春屢不歸宋吳仲孚貓
詩弄花撲蝶悔當年喫到殘糜味却鮮不肯春風留
業種破氈尋夢佛燈前名畫評何尊師貓有展膊者
金王良臣貓詩三生白老與烏圓宋徐集孫詩亂葉
打窗貓上案

又前題

花毛褐染炎天尚記荷塘爭浴鼠卜閒時畫損砌苔
幽綠闌干幾曲任側輓橫眠初熟恰又歛脩脩金尾
蝶衣偷蹴忽起驚跳風竹聽蠅鳴茶鼎何曾輕觸
暮眼纔圓香綺叢邊看足雨簷聲續休喫盡草芽盈
羽娛幽獨勝了後猊鏤玉西陽雜俎楚州謝陽山貓
有褐花者埤雅貓亦如虎
畫地上食俗謂之鼠卜元好問貓詩側輓橫眠却自
如錢惟善貓詩秋花石上玉後猊金尾脩脩歛四蹄
唐盧延遜詩貓跳觸鼎翻埤雅貓早暮則眼圓宋張
至龍詩貓卧香綺叢田家雜占貓喫青草主雨

又前題

妝樓鎮卧底須詰取於菟癡小解事吳娃戲學鳳仙
親搗紅絲繚繞便萬貫呼來還少防失却裏蹄重鑄

閒坊尋到 蟋蟀吟中醒悄正無聲四壁立殘斜照
不捕依然堦藥紛披藏好乳兒初飽坐榻畔微溫相
惱春回早八九墻陰新掃詩花陰閒卧小於菟癸辛
雜識回回國婦女以鳳仙花染貓爲戲秦氏女孫失
貓下臨安府訪之不得賂以金貓乃已袁桷醉貓詩
醒來獨立闌干畔四壁無聲蟋蟀吟李霸之畫貓在
藥苗間程鉅夫貓詩金絲色軟坐常溫飽食深宮錦
作墩古諺云八九七十二貓犬尋陰地張搏家貓名
萬貫見記事殊

湘春夜月 當歌有感

剪春燈越羅無奈寒侵裊裊乍嘯鶯吭清絕月穿林
丁字竿垂簾下恐落梅風起吹散難尋算世間只有
酸甜幾拍堪訴情深 朱顏暗換錦屏迢遞千萬沉

吟搵透啼衫知那裏弄絲烟柳猶繫人心鱗乖雁阻
寫翠牋誰是知音恁怨咽縱當時聽得愁眉早聚何
况而今

憶少年

朝雲湖上春風門外非烟牆畔行來似無力好花枝
微顫 評泊圓姿應未見憶長蛾碧山俱遠清宵夢
難到恨雙雙銀蒜

戀繡衾

羅屏低隔塵繞街冷香茸初卸小釵見說道分攜近
悄無言愁黛費猜 雁燈花共珠啼墜寫烏絲剛捲

又開始信有銷魂賦最銷魂蘭漿未催

玉樓春

銀塘冰泮晴波溜照影獨來凝立久一痕風帶不須
寬兩剪山螺依舊秀 釵梁蜂蝶勞纖手底事暗驚
朱粉瘦欲絲未絮恰纔芽漸逗新愁渾似柳

感皇恩

已是殺釭花月籠深閣何處行雲到巫峽一灣流水
只有浮萍開闔依稀親記鬪池邊鴨 明日暖風蘭
紗裁夾玉剪多情度簾押密犀燭念定帶露痕偷搯
幾時頻見也纖紅甲

清平樂

香塵不起鏡屨清於水親試盤鴉簾影底細雨蘭膏
微膩徘徊欲就雲綢些些轉側橫波聽得花冠唱
也料應堦日斜趁

庾信賦還抽鏡屨

賣花聲

艷韻徧芳蹊幾字高低宋牆東畔謝橋西喚到將離
春事減腸斷紅閨解語定淒迷留綴鸞篋香隨口
角賤如泥猶勝風欺并雨妒分付鶯啼

又

春信一番新春水生鱗春花春鳥尙逡巡剪就釵頭

春勝也添箇春人、準擬踏春塵春色初勻春風困
著小腰身製就春詞知幾首帖寫宜春

西湖月

明李太后寫九蓮觀音在借秋閣

匆匆夢了華胥早驚嶺窗前現將圖畫翠瓔長帶穠
纖筆勢冷綃光研岩居瞻瑞相傍一榻松風塵外掛
任世上苦入秋心依舊九蓮開也 署年髣髴神宗
說侍養深宮白頭閒話月輪圓裏山河小影似驚飄
瓦與亡多少事便指與枯禪應淚灑已零落阿監當
時奉香黃帕

鳳凰臺上憶吹簫

堯簫

紫竹猶多白牙翻賤別有哀玉清圓盡奪得千峰翠
色寄與秦仙一夜秋生指下通宛轉星孔勾鐫瓊枝
瘦脆管似鵝輕翳如蟬誰知越窑古製好吹出氤
氲五色飛烟莫負却青鸞素約冷倚襟前風外花甌
共戛修新譜悠咽逾妍空明境依約赤壁回船

皂羅特髻

采包頭

膠鬢攏罷稱滑笏吳綃摺成如水淺絙素額更斜遮
蟬翅重窺鏡非關怕冷上頭初愛道隨時世最宜淡
汙恁畧施珠翠還把一痕縣擘襯微微紅起春愁
困莫教半卸到殘妝端正分明是碧烟抹斷看兩蛾

尤細

水龍吟

題董羽出水戲珠龍圖上有御前之印并宣和御押

千年紙上風雲弄珠飛出宣和殿
滄波涌雪銀鱗墨爪騰空如練閒
却綃宮橘花開盡有何人見
只參龍舊姓毘陵啞子吹腥雨穿枯硯
回首天家頓遠尙塵中匆匆流轉神湫易改
青燈素壁鏤痕休斷笛裏吟殘梭邊眠熟
不勝清怨望冰簾影外香銷幾縷海山秋晚

賀新涼

秋日登八詠樓

衫袖秋情逼倚闌干一時收盡金華山色
多謝連朝

西風緊吹我萍蹤江國又吹上層樓孤立欲洗胸懷
忙呼酒但溪聲西去鴻來北雲渡水天爲黑 參差
城郭今猶昔念休文一麾去後聲名輝赫宴罷樽前
惟家令老妓依然相識惹滿座傷心皆泣大好東田
歸應早便詩傳八詠真何益聊小住聽漁笛

玉漏遲

永康病中夜雨

薄遊成小倦驚風夢雨意長牋短病與秋爭葉葉碧
梧聲顫濕鼓山城暗數更穿入溪雲千片燈暈剪似
曾認我茂陵心眼 少年不負吟邊幾熨帛光陰試
香池館懽境消磨盡付砌蟲微歎客子關情藥裹覓

何地烟林疎散懷正遠
胥濤曉喧楓岸

秋林琴雅卷三

秋林琴雅卷四

壺中天

月夜過七里灘光景奇絕歌此調幾令衆山皆響

秋光今夜向桐江爲寫當年高躅風露皆非人世有
自坐船頭吹竹萬籟生山一星在水鶴夢疑重續挈
音遙去西巖漁父初宿 心憶汐社沉埋清狂不見
使我形容獨寂寂冷螢三兩點穿破前灣茅屋林淨
藏烟峰危限月帆影搖空綠隨流飄蕩白雲還卧深
谷

憶舊遊

河清秋雪菴

遡溪流雲去樹約風來山剪秋眉一片尋秋意是涼

花載雪人在蘆漪楚天舊愁多少飄作髩邊絲正浦
漱蒼茫閒隨野色行到禪扉忘機悄無語坐雁底
焚香蛩外絃詩又送蕭蕭響盡平沙霜信吹上僧衣
甕高一聲彈指天地入斜暉已隔斷塵喧門前弄月
漁艇歸

巷有彈指樓

瑤臺聚八仙

題徐丈紫山黃雪山房在學士港
口湖山幽勝處也

湖影拖藍門巷冷秋氣盡在茅檐掉頭歸興隨分繡
了霜蟬一夜幽蛩聲乍咽小窗幾片葉聲添正吟酣
瘦筇得意黃徧千巖心空掃屏艷冶便後身似住
雪北香南渭水西風塵土亦復何堪閒開琴趣自賞

祇相識孤鴻半捲簾籬花候愛有名濁酒無用閒談

水龍吟 雪中憶西溪

白天碎碎飛絲打窗又是年時雪火銷香鉅凍膠吟
管傷懷念別前度衝風江南江北酒旗明滅似寒鴉
身世驚棲不定歸來後欲華髮 心事無人能說憶
西溪此中清絕壓蘆浦冷吹花橋斷玉山遙列三兩
烟舫捕魚初罷柴門如月便長鑱荷了自尋黃獨也
堪怡悅

點絳脣

燈夕同宋杏洲周少穆集吳尺鳬瓶花齋

柳院燈疎

史達祖

朦朧淡月雲來去

李冠

年華似羽

陳允

無計相分付

萍梗孤蹤

往事隨風雨

黃公度

君知否

晁冲之

煩君妙語

王沂孫

留我花間住

姜夔

渡江雲

題汪叔江紅藥橋邊吟客圖

蕪城當此際
峭風捲雨黃柳尙蕭疎
玉勾亭畔月底
事飛來澹彩照西湖
襟情雪鍊儘乾坤清氣偏孤同
調處花間花外麗句也堪圖
何如二分無賴十里
銷魂記樊川前度閒瘦損燈邊
繭栗葉上盤盂君歸
爲問花安否想艷紅依舊紛敷
春夢濶江南夜夜啼
烏

綺羅香

春分

水榭收燈虹梁待燕判斷韶華如許九十芳辰一半
自今堪數嬌意緒欲暖翻寒嬾心性乍晴還雨已飄
殘梅雪鱗鱗溪桃花信未遲暮 簫樓應惜冶思誰
在生香徑裏和鶯低語約畧東風好似破瓜眉嫵剛
宿露蝶夢攪勻更惹烟柳絲偷取悵年時一掬春愁
試分知解否

又 送紫山之秣陵和留別韻

象管題花冰絃彈雪難得詞場同氣白髮相逢眼底
何論餘子已闖破竹屋藩籬更採取梅溪涯涘喜從
今軟繡湖山青旗風外踏歌起 無端堪此小別凝

岸浮雲墜絮離蹤應似舊院烟銷去問秦淮春水待
肯寄研北香牋還勝寫江南眉史夢隨君片月斜明
鴈聲帆影裏

六么令

春陰

雲留春住濃與恨重疊欲飛雨絲還嬾水際天低帖
漠漠穿簾疑暝燕子愁時節誰家羅襪翩翩無影惟
見沿堤草痕接風姨空帶妒性未解輕吹裂閒壓
幾曲疏闌盡上眉心結最不分明似夢欲說終難說
樓東悵絕芳期仍誤錯認梨花是斜月

摸魚子

簡吳尺鳧

乍歸來參旗還轉清幽繡谷無恙蘿垣拂翠低桐塢
時有鳴鳩相向蒐討廣愛似爾詞人心力拋非枉輕
煤佛帳更換芋書多彈蕉文好點筆石闌上 當年
事複壁應堪惆悵揚舲洗眼頻望披襟不比燕臺雪
佳月新燈春釀難競爽寫雙調吳蠶食葉毫尖響澄
湖熨浪約曬笠秋晴碧山如髻漁笛譜漁唱尺鳬近和予臺
城路咏蠶二首最工

八歸 夕陽

初翻雁背旋催鴉翼高樹半掛微暈銷凝最是登樓
意常對亂波紅蘸遠山青襯不管離亭歌欲斷漸照

去鞭痕將隱想故苑燕麥離離滿地弄金粉 何況
春遊乍歇花愁多少只惱黃昏偏近冷和帆落慘連
笳起更帶孤烟斜引誤雕闌倚徧霽色明朝也應準
無言處望中容易下却西牆相思人老盡

大聖樂

東園餞春追和周草窗韻

空苑游絲舊池飛燕薄陰千樹正小闌人意厭厭細
數亂花埋怨錦鳩呼雨皺得綠波新如倦似無奈啼
綃臨別浦春何在在南陌麴塵西窗烟縷 閒思古
今事苦有紫曲青樓千萬語且寄愁彩筆橫塘重見
楊枝應許尙戀淺寒羅衾曉記門掩紅香深院宇傷

飄泊是誰倚疎簾吹絮

臺城路

富景園宋史所云東園也舊在新門外今草橋門內近城卽其故址空池喬木間巷蕭寂予每經行不知古情之頓深也

生年落托東城下溪雲素心都負跡似潛夫身如灌
圃只記南朝衰柳牆根井口抱一片晴沙眼波微溜
縱不關愁露桃愁到不言後探春那回行徧冷飴
猶未賣人尙中酒藏謎花樓戲嬰水館別有憑闌紅
袖新烟信否過幾度酸風翠梢眉鬪竚立誰知暝鴉
飛去久

又

南湖感舊和蘭鵲韻

陰陰古木橫寒綠誰家繞門烟樹十載閒踪三生昨
地銷得吹香詩句眉彎老去剩暈秀遙山半低晴渚
盡日人稀碧蜻蜓胃蓼花在傷離還有舊伴周情

兼柳思檀拍無誤岸缺連雲闌空進月絕憶單衾眠

雨幽悰未苦更草暗王孫待歸遲暮欲覓風流問鷗

鷗不語

楊誠齋贊張功甫像云約齋子方內歟方外
歟風流歟窮愁歟老夫不知君其問諸白鷗

又

五月十八日東城閒居風雨驟屑忽動吟秋
之思書寄吳石倉先輩

閒人不作閒居賦新涼遽侵槐夏徑暗雲生池鳴雨
到誰共聯牀今夜平林急灑便招得秋風扇情疎謝
十載江湖起看窗畔釣筒掛須聽田水瀼瀼插秧

殊未晚盈耳陶寫屋捲重茅籬觀朝槿此意從無知
者殘書嬾把料城外荷聲小樓清野夢遠重尋白頭
燈底話

又 秋聲

簾淒燭暗眠還起清商幾處催發碎竹虛廊枯蓮淺
渚不辨聲來何葉桐飈又接盡吹入潘郎一簪愁髮
已是難聽中宵無用怨離別陰蟲還更切切玉窗
挑錦倦驚響簷鐵漏斷高城鐘疎野寺遙送涼潮鳴
咽微吟漸怯訝籬豆花間雨節時節獨自開門滿庭
都是月

又 用儲華谷韻

銷魂橋畔青青樹樹猶似此依戀却扇涼肌垂釵秀
髮爭得微波心暖花遊易斷早吹散尊前艷歌珠貫
說與鴛鴦晚汀自結綠陰伴 重樓依舊十里小屏
留倩影歸路猶短七孔鍼邊雙蓮節後知否移燈書
怨行雲不管悄隔了盧家玳梁棲燕好比江皋弄珠
帆漸遠

又 懷大滌舊遊

白雲多處飛仙住相思與雲爭繞泥酒衣單修琴歲
換零落來時瑤草塵緣未了見舞罷山香墜花侵帽

瘦却詩肩翠奩看影自成笑 清遊無伴最好亂峰
開九鑠曾許行到石脚跳泉松髯滴露千古長懷坡
老何堪俗擾待寄語芝童洞天仍掃一覽篝燈浩歌
星斗曉

月下笛

送周少穆北遊兼懷是諫在上虞

草長鶯啼江南節物送君南浦無情弱櫓慣話聲聲
離緒抱蘭絃空山共期滿衣雨雪生妙悟向游塵撲
馬垂楊籠袂此懷誰訴 杯行易盡挽碧水東流晚
烟何許勞歌散處便是衰燈孤旅太飄零未垂髫絲
壯心好在如意舞雁書來試問看碑有客先寄與

摸魚子

咏窩絲糖追和陳迦陵韻

剪瓊霜翠蓬深處
葱纖費盡料理果奩已逐銅仙散
異味何人能嗜
切利市勝猜徧
晶猊玉乳雕闌底
春絲若此想掃雪三千
揀花五百
甘冷未沾齒
冬郎去塵滿金鑾
密記多情樂府分製等閒粉繭消
元夜偷褻銀泥衫子
評泊似也不似君謨遠
貢輕紅荔燕姬解事
悄比並當時鏡鸞撲碎墮馬一窩細

瑣窗寒

爲吳畔民賦因樹亭

老綠迷空閒園已過百年
風雨陰陰幾日得意鳥聲喧處
儘無人欹牀勘書碧浮篆
蚓簾波午話洗桐舊

事移橙佳境問梅清句 前度鷗朋聚笑對影忘言
覆碁非誤江湖散盡冷淡杯泉衣露料中宵桃根共
攜待將片月臨翠羽領秋光未要深山踏葉橋邊去

白苧

偶閱瑤華集載紫山此詞愛其婉麗依韻和之

引愁來伴愁住眉長眼細愁無貯處染得桃花似醉
倩雛鶯趁閒喧破翠衾睡應悔月沉鉤語未盡匆匆
分袂離悰怕覺歸展柔羅補淚怪淚痕近時都化苔
生砌 驚起社前等燕巧夕藏蛛小顰輕笑難道何
曾省記便證絮拈萍與伊爲誓而今異昔漸檀霞褪
靨玉香銷臂悄立閒庭劃損瑤簪春又相棄甚日逢

迎不枉丹青寄

南浦

玉几久客真州不得消息歌以懷之

分手隔年期問而今忍見清陰如幄搖曳箇蟬鳴懷
人句還似淒然同作吞花卧酒兩湖烟月都蕭索應
爲青山無計買只把薄遊銷却長安飛雪深窗與
梅花主客西溪曾約歸到定秋陰悲秋意仍在小園
籬落今晨剝啄翠簷風動敲疎箔何事因循書不寄
知倚那家江閣

百字令

六月望夜宗陽宮老君臺玩月括楊仲弘詩

老君臺迥夜涼多如水卧看分明穿出冰輪松桂外

二更將轉三更大地塵消山河影小風露上頭生寒
侵環珮九天飛過無聲誰喚絕唱楊郎龍蛇竝起
金榜掃初成笞鳳鞭鸞遊賞極玉纖雙載吹笙不信
人間輸君才調猶阻弱流程醒心今夕此身真到蓬
瀛

西子妝

同符幼魯趙谷林意川西池納涼

欹榭何峰穿簷那樹步過綠陰斜徑天然十畝瘦西
湖恍相思采蓮人靜闌干更迥壓風鷺絲飄不定遠
香生頓夢辭冰簟涼歸衫影攜幽興隔竹山童小
煮紅蘂茗一篇秋水趣無多澹娟娟柳深沙淨疎蟬

曳暝看催展綃烟籠鏡任螢飛自照回塘夜永

露華

玉簪

峽雲夢遠覓髻底瑤肪悄在秋苑露朵半欹遮住青
鸞輕扇絕憐淡雅風姿只隔幔紗遙見涼颺度嫣然
笑拈闌掃初綰 銜來貼地腰軟稱香浸銅瓶幽素
零亂脆萼猶函黃粉何事吹綻幾日靜抱花愁思重
碧濤芳宴闌影外琤琤雨敲又晚

貂裘換酒

得子珍廬江書詞以代答并及繪友消息

世事今無味卧風前晚涼岸幘停雲思起驢背黃塵
歸先後不道分攜似此似社燕秋鴻相避巢姥湖邊

安吟笈弔曹公寂寞英雄地歸不速負春水 草衣
我亦隨緣耳愛東園清蟬古木說羲皇意一卷傳來
天台句移得泉聲在紙定袪暑明朝都洗屋角斜陽
明沙外剩斯人近又遊燕市竹溪約幾時是

徵招

爲蔣丈雪樵賦

忘機石上行歌去清寒自然堪耐萬玉綴疎林笑靨
山顏改徑迷歸鳥外怕埋却幽人蘿帶白斷溝中溼
侵焦尾問誰能買 南北兩番風仙家事重看冷塵
飛灑酒熟倒葫蘆有山童相待梅花猶可戴指千古
烟梢春在會心處與伴披裘已洗空銀海

南鄉子 揮扇士女

風小暫回裙立盡桐陰晝欲徂扇影似人人似月圓
初十六盈盈十五餘 驀地轉清臚爲有關心好句
書不用近前頻掩面生疎水院雲廊見也無

謁金門

凭闌檻雨洗秋濃人淡隔水殘霞明冉冉小山三四
點 艇子幾時同泛待折荷花臨鑑日日綠盤疎粉
豔西風無處減

浣溪紗

獨背低花一欠伸舊攜手處綠生塵怪他鸚鵡語如

人未肯無情拋好月長將多病伴濃春樓中凝望
鏡中顰

又

數到湘琴未滿絃春殘過了摘櫻天芳時卯飲最思
眠八字眉痕剛半畫二分月影恰重圓第三橋外
見飛仙

踏沙行

湖上有感

屐齒沙痕髣髴烟影十年迷却探春徑憑誰重唱竹
枝歌淒涼不是當時聽敗舫紅凋危闌香凝湖風
還我登臨興梨雲柳霧捲俱空而今纔放青山醒

摸魚兒

七夕雨中集小山堂分得漸字

問天邊妒津何許今宵銀浦偏暗巧棚兒女關情事
贏得英雄悽黯渾是感算雨雨風風盡把心期賺青
樓夢澹任不嫁娉婷應須覓箇羅屋竹香捲開襟
話洗出平池菡萏詩思多在涼簟秋光挽住憑杯酒
莫放髩霜來漸雲半歛傷幾葉高梧漸瀝聽殘點溼
蟾未減恐靈鵲明朝訴伊辛苦花水羽衣染

阮郎歸

殘香漠漠雨垂垂寒輕猶戀衣無端箏柱似佳期參
差常暗移
慵曉起怕春歸咒教花放遲桃花也有

念人時倚窗窺畫眉

長相思 綠萼梅

生九疑住九疑自小山光染玉姿碧羅天上飛
春到時雪到時獨向花中咏綠衣斷魂烟月知

洞仙歌 秋陰

癡雲何事做人間秋窄倦柳衰蘭更無色想登山臨
水宋玉愁多風吹去遮盡湘天暮碧孤村烟草外
一片淒迷白鳥明邊倚樓立情味近中年最怕傷心
都付與數聲長笛聞那處天涯有斜陽待鴈寄書來
定知消息

高陽臺

成窰九十九子斃合同被江壽田作

秘翠分峰凝花出土依稀粉滴脂函鉤合前塵宮羅
冷却黃尖浮梁猶有當時月向夜深孤照秋奩怨長
門夢斷蒼龍字漬眠蠶 戲嬰圖子誰描得恰臨妝
試仿黛筆重添數比螽斯未曾盈百休嫌從今舊價
卑哥汝宛青娥紅淚偷淹莫銷魂漢苑瑤箱久落江
南 明時薨器進御者皆出浮梁之景德鎮

秋波媚

一寸橫波惹春畱何止最宜秋妝殘粉薄矜嚴消盡
只有溫柔 當時底事匆匆去悔不載扁舟分明記

得吹花小徑聽雨高樓

西江月

擬豔同張東扶賦

春淺初勻細黛寒輕不上仙肌玉梅花下見來遲夜
月淡屏無睡心倚紅牋能說情除青鏡難知試香
天氣惜香時人靜街痕如水

清平樂

宿符聖基秋聲館同幼魯作

酒香人定冷落黃花徑吟到江楓寒未勁雨入餅笙
堪聽自饒朱玉才情何妨榜以秋聲今夜秋聲重
做斷雲新鴈程程

秋林琴雅卷四

樊榭先生幽居道古脩然清遠詩文之外銳意于詞
嘗病倚聲家詭蕩者失之靡豪健者失之肆因約情
斂體浚秀脩邈興至思集輒自比之孫氏一絃柳家
雙鐫要以自寫胸抱非求悅衆耳也十年以來已有
三數曲流傳朋游間賞音者以所見未多爲憾予因
請于先生盡發篋衍之藏釐爲四卷鋟而行之夫昔
賢論詞雅正爲宗故清真堂名顧曲草窗堂名志雅
惟志雅而後可言顧曲也嗣是必有援琴受譜者子
仍得而讀之快何如已壬寅十一月三日宛平龔煒
履吉謹跋

秦郵夏秉謙校